

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ՀԱՅՏԱՐԱՐՈՒԹՅՈՒՆ

ԲՈՂՈՔԻ ՆԵՐԿԱՅԱՑՄԱՆ ՎԵՐԱԲԵՐՅԱԼ

Բողոքի ծածկագիրը և ամսաթիվը՝ ԳԲՔԱ-ԼՕ-2022/13, 25.01.2022թ.

Բողոք բերող անձ՝ «Տիգման Գրուպ» ՍՊԸ

Պատվիրատու՝ ՀՀ ոստիկանություն

Գնման ընթացակարգի ծածկագիրը՝ «ՀՀ Ո ԷԱՃԱՊՁԲ-ՍԱՐՔ/ԿՏՏՎ/2022-13»

էլեկտրոնային աճուրդ

Գնման առարկան՝ սարք-սարքավորումների ձեռքբերում

Բողոքի պահանջը՝ պարտավորեցնել «ՀՀ Ո ԷԱՃԱՊՁԲ-ՍԱՐՔ/ԿՏՏՎ/2022-13» ծածկագրով էլեկտրոնային աճուրդի գնահատող հանձնաժողովին՝

1. դադարեցնել 18.01.2022թ.-ին տեղի ունեցած նիստի թիվ 3 արձանագրությամբ ընդունված որոշումները,
2. դադարեցնել պակմանագիր կնքելու մասին որոշումները,
3. կրկին ծանուցել «Տիգման Գրուպ» ՍՊԸ-ին շտկելու վերաբերյալ /մանրամասն նկարագրով, թե ինչը պետք է շտկվի/:

ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ՝ Լ. ՕՀԱՆՅԱՆ

ՔԱՐՏՈՒՂԱՐ՝ Ռ. ՄԿՐՏՉՅԱՆ

Նիստերին կարելի է առցանց հետևել <https://www.e-gov.am/gnumner/> հղումով.

Տեղեկացնում ենք, որ «Գնումների մասին» ՀՀ օրենքի՝

- 50-րդ հոդվածի 10-րդ մասի համաձայն՝ յուրաքանչյուր անձ, որի շահերը խախտվել են կամ կարող են խախտվել բողոքարկման հիմք ծառայած գործողությունների արդյունքում, իրավունք ունի մասնակցելու բողոքարկման ընթացակարգին՝ մինչև բողոքի վերաբերյալ

որոշում ընդունելու ժամկետը գնումների հետ կապված բողոքներ քննող անձին ներկայացնելով համանման բողոք: Նույն հոդվածի համաձայն՝ բողոքարկման ընթացակարգին չմասնակցած անձը զրկվում է գնումների հետ կապված բողոքներ քննող անձին համանման բողոք ներկայացնելու իրավունքից,

- 51-րդ հոդվածի 1-ին մասի համաձայն՝ գնումների հետ կապված բողոքներ քննող անձին ներկայացված բողոքն ինքնաբերաբար կասեցնում է գնման գործընթացը՝ նույն օրենքի 50-րդ հոդվածի 9-րդ մասով նախատեսված հայտարարությունը հրապարակվելու օրվանից մինչև բողոքարկման վերաբերյալ ընդունված որոշման՝ տեղեկագրում հրապարակման օրը ներառյալ:

ՀՀ գնումների հետ կապված բողոքներ քննող անձին

Հասցե՝ ՀՀ, ք. Երևան, Մելիք Աղայան 1,
ՀՀ ֆինանսների նախարարություն

Բողոք բերող՝ «Տիգման Գրուպ» ՍՊԸ
Հասցե (գտնվելու վայր)՝ ՀՀ, ք. Երևան, Մոլդովական 20/40
Էլ. փոստ՝ tigmangroup@yandex.ru
Հեռ.՝ +(374) 91 91 99 01

Պատվիրատու՝ ՀՀ ԿԱ ոստիկանություն
Հասցե՝ ՀՀ, ք. Երևան, Նալբանդյան 130

Գնման ընթացակարգի ծածկագիրը և առարկան՝
ՀՀ ԿԱ ոստիկանության կարիքների համար՝ սարք-սարքավորումների ձեռքբերման նպատակով
հայտարարված
«ՀՀ Ո ԷԱՃԱՊՁԲ-Սարք/ԿՏՏՎ/2022-13» ծածկագրով էլեկտրոնային աճուրդ

ԲՈՂՈՔ

• Գործի հակիրճ նկարագրությունը և բողոքի փաստերը

✓ ՀՀ ԿԱ ոստիկանության կարիքների համար՝ սարք-սարքավորումների ձեռքբերման նպատակով հայտարարվել է «ՀՀ Ո ԷԱՃԱՊՁԲ-ՍԱՐՔ/ԿՏՏՎ/2022-13» ծածկագրով էլեկտրոնային աճուրդ (այսուհետև կան՝ Ընթացակարգ), որին մասնակցության հայտ է ներկայացրել նաև «Տիգման Գրուպ» ՍՊԸ-ն:

✓ Ընթացակարգի գնահատող հանձնաժողովի 12.01.2022թ. տեղի ունեցած նիստի թիվ 2 արձանագրության /կցվում է/ համաձայն՝

• Մասնակիցների կողմից ներկայացված հայտերը կազմված և ներկայացված են հրավերի պահանջներին համապատասխան:

• «ՀՀ Ո ԷԱՃԱՊՁԲ-ՍԱՐՔ/ԿՏՏՎ/2022-13» ծածկագրով ընթացակարգի 3-րդ, 4-րդ, 6-րդ, 8-րդ և 9-րդ չափաբաժինների տեխնիկական բնութագրերը անհրաժեշտ է հստակեցնել: Մասնավորապես, 3-րդ, 4-րդ և 9-րդ չափաբաժիններում անհրաժեշտ է հստակեցնել սարքերի մոդելները և չափերը: 6-րդ չափաբաժնում՝ հստակեցնել տեխնիկական բնութագրերը՝ հրավերի տեխնիկական բնութագրերին համապատասխան: 8-րդ չափաբաժնում նշել, թե որ սերնդի պրոցեսոր է տրամադրվում:

• Մասնակիցներին վերահիշյալ չափաբաժիններում տեխնիկական բնութագրերում անհամապատասխանությունները շտկելու համար տրվում է մեկ աշխատանքային օր:

✓ Ընթացակարգի գնահատող հանձնաժողովի 18.01.2022թ. տեղի ունեցած նիստի թիվ 3 արձանագրության /կցվում է/ համաձայն՝ «Տիգրան Գրուպ» ՍՊԸ-ի կողմից ներկայացված հայտում առկա էին անհամապատասխանություններ:

13.01.2022թ. մասնակիցներին տրվել է մեկ /1/ աշխատանքային օր՝ անհամապատասխանությունների շտկման համար: «Տիգրան Գրուպ» ՍՊԸ-ի կողմից չի կատարվել անհամապատասխանությունների շտկում:

✓ Արդյունքում Ընթացակարգի գնահատող հանձնաժողովը որոշել է «Տիգրան Գրուպ» ՍՊԸ-ի հայտը գնահատել անբավարար և մերժել:

• *Բողոքի իրավական հիմքերը և հիմնավորումները.*

ՀՀ Սահմանադրության 86-րդ հոդվածի 1-ին մասի 1-ին կետի համաձայն՝ տնտեսական, սոցիալական և մշակութային ոլորտներում *պետության քաղաքականության հիմնական նպատակներն են գործարար միջավայրի բարելավումը և ձեռնարկատիրության խթանումը:*

«Գնումների մասին» ՀՀ օրենքի (այսուհետ՝ նաև Օրենք) 3-րդ հոդվածի 1-ին մասի համաձայն՝ սույն օրենքի նպատակն է ապահովել գնումների գործընթացում հատուցման դիմաց արժեք, այն է՝

1) պատվիրատուին վերապահված լիազորությունների կատարման համար անհրաժեշտ՝ կարիքին համապատասխան ապրանքների, աշխատանքների և ծառայությունների ձեռքբերում՝ համարժեք հատուցմամբ.

2) գնումների և գնումների գործընթացի տնտեսող, արդյունավետ և օգտավետ իրականացում:

Նույն հոդվածի 2-րդ մասի համաձայն՝ գնումների գործընթացը հիմնվում է հետևյալ սկզբունքների վրա.

1) գնման գործընթացի միասնական կանոններով մրցակցային, թափանցիկ, համաչափ, հրապարակային և ոչ խտրական հիմունքներով կազմակերպում.

2) պայմանագրի կնքման նպատակով մասնակիցների շրջանակի ընդլայնում և նրանց միջև մրցակցության խրախուսում.

3) ցանկացած անձի համար, անկախ նրա օտարերկրյա ֆիզիկական անձ, կազմակերպություն կամ քաղաքացիություն չունեցող անձ լինելու հանգամանքից, գնման գործընթացին մասնակցելու իրավահավասարություն:

Օրենքի 7-րդ հոդվածի 1-ին մասի համաձայն՝ ցանկացած անձ, անկախ նրա օտարերկրյա ֆիզիկական անձ, կազմակերպություն կամ քաղաքացիություն չունեցող անձ լինելու հանգամանքից, ունի գնման գործընթացին մասնակցելու հավասար իրավունք:

Օրենքի 9-րդ հոդվածի 1-ին մասին 8-րդ կետի համաձայն՝ գնման ընթացակարգի արձանագրությունը պարունակում է հայտի մերժման դեպքում՝ դրա հիմնավորումը:

Օրենքի 34-րդ հոդվածի 1-ին մասի համաձայն՝ հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:

ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի (հետայսու նաև՝ Կարգ) 26-րդ կետի 9-րդ ենթակետի համաձայն՝ գնահատող հանձնաժողովի անդամը պատասխանատվություն է կրում իր որոշումների, այդ թվում՝ իր կողմից հաստատված փաստաթղթերի, պահանջների, ինչպես նաև գնման ընթացակարգի հաղթողին որոշելու հիմնավորվածության համար:

Կարգի 41-րդ կետի համաձայն՝ եթե հայտերի բացման և գնահատման նիստի ընթացքում իրականացված գնահատման արդյունքում մասնակցի հայտում արձանագրվում են անհամապատասխանություններ՝ հրավերի պահանջների նկատմամբ, ներառյալ այն դեպքերը, երբ հայտում ներառված՝ Հայաստանի Հանրապետության ռեզիդենտ հանդիսացող մասնակցի կողմից հաստատված փաստաթղթերը կամ դրանց մի մասը հաստատված չեն էլեկտրոնային թվային ստորագրությամբ, ապա հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին էլեկտրոնային եղանակով ծանուցում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունն: Եթե անհամապատասխանությունն արձանագրվել է ՀՀ պետական եկամուտների կոմիտեից ստացված տեղեկատվության հիման վրա, ապա մասնակցին ուղարկվող ծանուցմանը կցվում է նաև կոմիտեից ստացված տեղեկատվության բնօրինակից սկանավորված տարբերակը: Մասնակցին ուղարկվող ծանուցման մեջ մանրամասն նկարագրվում են հայտնաբերված անհամապատասխանությունները:

Կարգի 46-րդ կետի համաձայն՝ կարգի 43-րդ կետի 4-րդ ենթակետով նախատեսված ժամկետի ավարտին հաջորդող աշխատանքային օրը քարտուղարն էլեկտրոնային եղանակով հանձնաժողովի անդամներին միաժամանակ տրամադրում է առաջին տեղն զբաղեցրած մասնակցի կողմից ներկայացված փաստաթղթերի պատճենները, գնահատման թերթիկների

երկուական օրինակ և կոմիտեից ստացված տեղեկատվությունը: Հայտերի գնահատման արդյունքների հաստատման նիստը հրավիրվում է սույն կարգի 32-րդ կետի 22-րդ ենթակետով սահմանված ժամկետներում: Ընդ որում, ապրանքների գնման դեպքում հանձնաժողովը գնահատում է նաև ներկայացված տեխնիկական բնութագրերի համապատասխանությունը հրավերի պահանջներին, *իսկ անհամապատասխանություն արձանագրելու դեպքում հանձնաժողովի նիստի արձանագրության մեջ մանրամասն նկարագրվում են հայտնաբերված անհամապատասխանությունները:*

ՀՀ ԿԱ ոստիկանության կարիքների համար՝ սարք-սարքավորումների ձեռքբերման նպատակով հայտարարվել է «ՀՀ Ո ԷԱՃԱՊՁԲ-ՍԱՐՔ/ԿՏՏՎ/2022-13» ծածկագրով էլեկտրոնային աճուրդ, որին մասնակցության հայտ է ներկայացրել նաև «Տիգման Գրուպ» ՍՊԸ-ն:

Ինչպես արդեն հայտնել ենք, Ընթացակարգի գնահատող հանձնաժողովի 12.01.2022թ. տեղի ունեցած նիստի թիվ 2 արձանագրությամբ քննամենը վերացական նշվել են չափաբաժինների համարները և նույն ձևով վերացական նշվել են այդ չափաբաժիններում առկա անհամապատասխանությունները՝ չնշելով ոչ անհամապատասխանություն թույլ տված մասնակիցների անունները, ոչ էլ վերջիններիս կողմից թույլ տրված կոնկրետ սխալները/անհամապատասխանությունները:

Այնուհետև, Ընթացակարգի գնահատող հանձնաժողովի 18.01.2022թ. տեղի ունեցած նիստի թիվ 3 արձանագրության /կցվում է/ համաձայն՝ նույն կերպ վերացական նշվել է, որ «Տիգման Գրուպ» ՍՊԸ-ի կողմից ներկայացված հայտում առկա էին անհամապատասխանություններ: Արդյունքում Ընթացակարգի գնահատող հանձնաժողովը որոշել է «Տիգման Գրուպ» ՍՊԸ-ի հայտը գնահատել անբավարար և մերժել:

Այսպիսով, գտնում ենք, որ ՀՀ ԿԱ ոստիկանության կարիքների համար հայտարարված «ՀՀ Ո ԷԱՃԱՊՁԲ-ՍԱՐՔ/ԿՏՏՎ/2022-13» ծածկագրով էլեկտրոնային աճուրդի հանձնաժողովը խախտել է գնումների մասին ՀՀ օրենսդրությամբ սահմանված պահանջները, մասնավորապես՝ Ընթացակարգի գնահատող հանձնաժողովի թե՛ 12.01.2022թ. տեղի ունեցած նիստի թիվ 2 արձանագրության և թե՛ 18.01.2022թ. տեղի ունեցած նիստի թիվ 3 արձանագրության համաձայն՝ անհայտ է մնում, թե «Տիգման Գրուպ» ՍՊԸ-ի կողմից ներկայացված հայտում ինչպիսի անհամապատասխանություններ էին առկա, ՍՊԸ-ն ինչ պետք է շտկեր, և նույն վերացական հիմքն է հայտը մերժելու համար:

Արդյունքում, Ընթացակարգի գնահատող հանձնաժողովը խախտել է «Գնումների մասին» ՀՀ օրենքի 9-րդ հոդվածի 1-ին մասին 8-րդ կետի, ինչպես նաև Կարգի 29-րդ և 46-րդ կետերի պահանջները, քանի որ թե՛ անհամապատասխանությունը հստակ արձանագրված չէ, թե՛ հիմնավորված չէ հայտը մերժելու մասին որոշումը:

Վերոհիշյալի արդյունքում անկհայտորեն խախտվել է նաև իրավական որոշակիության և կանխատեսելիության սահմանադրական սկզբունքները (այդ մասին ավելի մանրամասն՝ ՀՀ Սահմանադրական դատարանի 18.04.2006թ. թիվ ՍԴՈ-630, 15.01.2008թ. թիվ ՍԴՈ-723 և 29.01.2008թ. թիվ ՍԴՈ-731 որոշումները):

Բացի այդ, նման չհիմնավորված և վերացական որոշումները հանգեցրել են Օրենքի 3-րդ հոդվածի 2-րդ մասի 1-ին և 2-րդ կետով սահմանված պայմանագրի կնքման նպատակով մասնակիցների շրջանակի ընդլայնման և նրանց միջև մրցակցության խրախուսման սկզբունքի խախտմանը, ինչպես նաև Օրենքի 7-րդ հոդվածի 1-ին մասով երաշխավորված մասնակցի մասնակցության իրավունքի իրականացման սահմանափակմանը կամ ոչ լիարժեք իրականացմանը:

Բացի այդ, ՀՀ գնումների հետ կապված բողոքներ քննող անձի ուշադրությունն ենք ցանկանում հրավիրել հետևյալի վրա.

ՀՀ կառավարության 2017 թվականի մայիսի 4-ի թիվ 526-Ն որոշմամբ հաստատված «Գնումների գործընթացի կազմակերպման մասին» կարգի (հետայսու նաև՝ Կարգ) Կարգի 41-րդ կետի համաձայն՝ եթե հայտերի բացման և գնահատման նիստի ընթացքում իրականացված գնահատման արդյունքում մասնակցի հայտում արձանագրվում են անհամապատասխանություններ՝ հրավերի պահանջների նկատմամբ ներառյալ այն դեպքերը, երբ հայտում ներառված՝ Հայաստանի Հանրապետության ռեզիդենտ հանդիսացող մասնակցի կողմից հաստատված փաստաթղթերը կամ դրանց մի մասը հաստատված չեն էլեկտրոնային թվային ստորագրությամբ, ապա հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին էլեկտրոնային եղանակով ծանուցում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը: Եթե անհամապատասխանությունն արձանագրվել է ՀՀ պետական եկամուտների կոմիտեից ստացված տեղեկատվության հիման վրա, ապա մասնակցին ուղարկվող ծանուցմանը կցվում է նաև կոմիտեից ստացված տեղեկատվության բնօրինակից սկանավորված տարբերակը: Մասնակցին ուղարկվող ծանուցման մեջ մանրամասն նկարագրվում են հայտնաբերված անհամապատասխանությունները:

Կարգի 42-րդ կետի համաձայն՝ եթե սույն կարգի 41-րդ կետով սահմանված ժամկետում մասնակիցը շտկում է արձանագրված անհամապատասխանությունը, ապա նրա հայտը գնահատվում է բավարար: Հակառակ դեպքում տվյալ մասնակցի հայտը գնահատվում է անբավարար և մերժվում է, ներառյալ եթե մասնակիցը սույն կարգի 32-րդ կետի 1-ին մասի «ե» պարբերությամբ սահմանված ժամկետում չի ներկայացնում հայտի ապահովման բնօրինակը, իսկ ընտրված մասնակից է ճանաչվում հաջորդող տեղ զբաղեցրած մասնակիցը:

Այսպիսով, ցանկանում ենք փաստել, որ Ընթացակարգի քարտուղարի կողմից որևէ շտկման ծանուցում չի ուղարկվել «Տիգման Գրուպ» ՍՊԸ-ին, որով Ընթացակարգի գնահատող հանձնաժողովը այդ մասով խախտել է Կարգի 41-րդ և 42-րդ կետերով սահմանված դրույթները:

Օրենքի 50-րդ հոդվածի 7-րդ մասի 1-ին կետի համաձայն՝ ՀՀ գնումների հետ կապված բողոքներ քննող անձն իրավունք ունի պատվիրատուի և գնահատող հանձնաժողովի գործողությունների կամ անգործության վերաբերյալ ընդունելու հետևյալ որոշումները.

ա. արգելելու կատարել որոշակի գործողություններ և ընդունել որոշումներ,

բ. պարտավորեցնելու ընդունել համապատասխան որոշումներ, ներառյալ՝ չկայացած հայտարարելու գնման ընթացակարգը, բացառությամբ պայմանագիրը անվավեր ճանաչելու մասին որոշման:

Ելնելով վերոգրյալից՝ ՀՀ գնումների հետ կապված բողոքներ քննող անձին

Խ Ն Ղ Ը Ն Ի Մ Ե Մ՝

1. Պարտավորեցնել «ՀՀ Ո ԷԱՃԱՊՁԲ-ՍԱԸՔ/ԿՏՏՎ/2022-13» ծածկագրով էլեկտրոնային աճուրդի գնահատող հանձնաժողովին դադարեցնել 18.01.2022թ. տեղի ունեցած նիստի թիվ 3 արձանագրությամբ ընդունված որոշումները:

2. Պարտավորեցնել «ՀՀ Ո ԷԱՃԱՊՁԲ-ՍԱԸՔ/ԿՏՏՎ/2022-13» ծածկագրով էլեկտրոնային աճուրդի գնահատող հանձնաժողովին դադարեցնել պայմանագիր կնքելու մասին որոշումները:

3. Պարտավորեցնել «ՀՀ Ո ԷԱՃԱՊՁԲ-ՍԱԸՔ/ԿՏՏՎ/2022-13» ծածկագրով էլեկտրոնային աճուրդի գնահատող հանձնաժողովին կրկին ծանուցել «Տիգման Գրուպ» ՍՊԸ-ին շտկելու վերաբերյալ /մանրամասն նկարագրելով, թե ինչը պետք է շտկվի/:

Կից ներկայացվում է՝

1. Պետական տուրքի վճարման անդորրագիրը:
2. Ընթացակարգի գեահատող հանձնաժողովի 12.01.2022թ. տեղի ունեցած նիստի թիվ 2 և 18.01.2022թ. տեղի ունեցած նիստի թիվ 3 արձանագրությունների պատճենները:

Առդիր՝ 9 թերթ:

Հարգանքով՝

«Տիգան Գրուպ» ՍՊԸ-ի տնօրեն՝



25 . Հունվարի. 2022թ.